

**Kalaallit Nunatsinni efterskolimik allisitamik, Tasiilami inissinneqartussamik, 2015-imi pilersitsinissaq pillugu Naalakkersuisut siunnersuusiornissamik peqquneqarnissaannik Inatsisartut aalajangiiffigisassaattut siunnersuut.**

(Inatsisartuni ilaasortaq Harald Bianco, Inuit Ataqatigiit)

**Akissuteqaat**

(Ilinniartitaanermut, Ilageeqarnermut, Kultureqarnermut Naligiissitaanermullu Naalakkersuisoq)

**Aappassaaneerneqarnera**

Naalakkersuisut Kultureqarnermut, Ilinniartitaanermut, Iisimatusarnermut Ilageeqarnermullu Ataatsimiititaliaq Tasiilami efterskolimik pilersitsinissaq pillugu aalajangiiffigisassatut siunnersuummik peqqissaartumik suliarinnissimanagerat pillugu qutsavigaat. Naalakkersuisut paasivaat allannguutissatut siunnersuummik suliaqartoqarsimasoq taarsiullugu Upernavimmi efterskolimik pilersitsinissaq pillugu. Naalakkersuisullu aamma paasivaat ataatsimiititaliami amerlanerussuteqartut siunnersuut taanna itigartissimagaat, taarsiullugulu amerlanerussuteqartut siunnersuuteqarsimallutik efterskolimik ilinniarfimmilluunniit allamik Tasiilami pilersitsisoqassasoq.

Naalakkersuisut suli isumaqarput peqqissaartumik aningaasaqarnikkut, aaqjissuussinikkut aamma nukiit atorneqartussat eqqarsaatigalugit misissuisoqartariaqartoq, nunatsinni ilinniarfimmik aammaarluni pilersitsisoqarnissaa pillugu aalajangiisoqannginnerani. Tamanna minnerunngitsumik ilinniartitaanerit iluanni sanaartornikkut pisariaqartitsinerit amerlasuut eqqarsaatigalugit, sanaartugassallu oqarsinnaavugut sukangasumik tulleriiarneqareernerisigut ilaannillu taamaatitsiinnartoqareeneratigut aatsaat aalajangersaasoqartarmat. Tamatumunnga atatillugu isumaliutigisassaqqippoq efterskolimik pilersitsisoqarsinnaannginneroq illuutini pioreersuni, imaluunniit ingerlatsivinni pioreersuni, taamalu pilersitsinermi aningaasartuutikinneruffiusinnaasuni.

Taamatut naatsunik oqaaseqaateqarluta oqallinneq siunnersuummullu atatillugu taasisitsineq Naalakkersuisuni malinnaaffigissavarput, tamatumalu kingorna Inatsisartut aalajangererat tusaatissatut tigullutigu – taamaassappallu ilinniartitaanikkut sanaartugassanut pilersaarummut ilanngullugu.